

摘藻堂四庫全書薈要

集部

欽定四庫全書薈要

集部

白氏長慶集卷二十八
九

臣

王杰詳校

詳校官助教臣常循



欽定四庫全書薈要卷一萬三千九百五十八

集部

白氏長慶集卷二十八

唐白居易撰

律詩 五言七言凡一百首

洛陽春

洛陽陌上春長在昔別今來二十年
唯覓少年心不得其餘萬事盡依然

恨去年

老去猶耽酒春來不着家去年來校晚不見洛陽花

早出晚歸

早起或因攜酒出晚歸多是看花迴若拋風景長閒坐
自問東京作底來

魏王堤

花寒懶發鳥慵啼信馬閒行到日西何處未春先有思
柳條無力魏王堤

嘗黃醅新耐憶微之

世間好物黃醅酒天下閒人白侍郎愛向卯時謀洽樂
亦曾酉日放麈狂醉來枕麪貧如富

詩云一
醉日富

身後堆金

有若亡元九計程殊未到甕頭一盞共誰嘗

勸行樂

少年信美何曾久春到雖遲不再逢歡笑勝愁歌勝哭
請君莫道等頭空

老慵

豈是交親向我疎老慵自愛閉門居近來漸喜知聞斷

免惱嵇康索報書

酬別微之

臨都驛
醉後作

灋頭峽口錢塘岼三別都經二十年且喜筋骸俱健在
勿嫌鬚鬢各皤然君歸北闕朝天帝我住東京作地仙
博望自來非棄置承明重入莫拘牽醉收盃杓停燈語
寒展衾裯對枕眠猶被分司官繫絆送君不得過甘泉
予與微之老而無子發於言歎著在詩篇今年
各有一子戲作二什一以相賀一以自嘲

常憂到老都無子何況新生又是兒陰德自然宜有慶

于公陰德其後蕃昌

皇天可得道無知

皇天無知伯道無兒

一園水竹今為

主

微之履信新居多水竹也

百卷文章更付誰

微之文集凡一百卷

莫慮鵷雛

無浴處即應重入鳳凰池

五十八翁方有後靜思堪喜亦堪嗟一珠甚少還慙蚌

八子雖多不羨鴉秋月晚生丹桂實春風新長紫蘭芽

持盃祝願無他語慎勿頑愚似汝爺

自問

年來私自問何故不歸京佩玉腰無力看花眼不明老
慵難發遣春病易滋生賴有彈琴女時時聽一聲

晚桃花

一樹桃紅亞

低也

拂池竹遮松蔭晚開時非因斜日無由

見不是閒人豈得知寒地生材遺拔易貧家養女嫁常
遲春深欲落誰憐惜白侍郎來折一枝

夜調琴憶崔少卿

今夜調琴忽有情欲彈惆悵憶崔卿何人解愛中徽上

秋思頭邊八九聲

阿崔

謝病臥東都羸然一老夫孤單同伯道遲暮過商瞿豈
料鬢成雪方看掌弄珠已衰寧望有雖晚亦勝無蘭入
前春夢桑懸昨日弧里閭多慶賀親戚共歡娛膩剝新
胎髮香綳小繡襦玉芽開手爪酥顆點肌膚弓冶將傳
汝琴書勿墜吾未能知壽夭何暇慮賢愚乳氣初離殼
啼聲漸變鵲何時能反哺供養白頭烏

贈鄰里往還

問予何故獨安然免被飢寒婚嫁牽骨肉都盧無十口
糧儲依約有三年但能抖擻人間事便是逍遙地上仙
唯恐往還相厭賤南家飲酒北家眠

王子晉廟

子晉廟前山月明人聞往往夜吹笙鸞吟鳳唱聽無拍
多似霓裳散序聲

晚起

起晚憐春煖歸遲愛月明放慵長飽睡聞健且閒行北
闕停朝簿西方入社名唯吟一句偈無念是無生

酬皇甫賓客

玄晏家風黃綺身深居高臥養精神性慵無病常稱病
心足雖貧不道貧竹院君閒銷永日花亭我醉送殘春
自嫌詩酒猶多興若比先生是俗人

池上贈韋山人

新竹夾平流新荷拂小舟衆皆嫌好拙誰肯伴閒遊客

為忙多去僧因飯暫留獨憐韋處士盡日共悠悠

無夢

老眼花前閤春衣雨後寒舊詩多忘却新酒且嘗看拙
定於身穩慵應趁伴難漸銷名利想無夢到長安

對小潭寄遠上人

小潭澄見底閒客坐開襟借問不流水何如無念心彼
惟清且淺此乃寂而深是義誰能答明朝問道林

閒吟二首

留司老賓客春盡興如何官寺行香少僧房寄宿多閒
傾一盞酒醉聽兩聲歌憶得陶潛語義皇無以過

閒遊來早晚已得一周年嵩洛供雲水朝廷乞俸錢長
謫時獨酌飽食後安眠聞道山榴發明朝向玉泉

獨遊玉泉寺

三月三十日

雲樹玉泉寺肩舁

雲俱切

半日程更無人作伴祇共酒同

行新葉千萬影殘鷺三兩聲閒遊竟未足春盡有餘情

晚出尋人不見

籃輦不乘乘晚涼相尋不遇亦無妨輕衣穩馬槐陰下
自要閒行一兩坊

苦熱

頭痛汗盈巾連宵復達晨不堪逢苦熱猶賴是閒人朝
客應煩倦農夫更苦辛始慙當此日得作自由身

銷暑

何以銷煩暑端居一院中眼前無長物窓下有清風熱
散由心靜涼生為室空此時身自得難更與人同

行香歸

出作行香客歸如坐夏僧林前雙草屨簷下一紗燈珮
委腰無力冠欹髮不勝鸞臺龍尾道合盡少年登

同王十七庶子李六員外鄭二侍御同年四人
遊龍門有感而作

一曲悲歌酒一樽同年零落幾人存世如閱水應堪歎
名似浮雲豈足論各從祿仕休明代共感平生知己恩
今日與君重上處龍門不是舊龍門

池上小宴問程秀才

洛下林園好自知江南景物闌相隨淨淘紅粒畧

烏咸切

香飯薄切紫鱗烹水葵雨滴蓬聲青雀舫浪搖花影白
蓮池停盃一問蘇州客何似吳松江上時

橋亭卯飲

卯時偶飲齋時臥林下高橋橋上亭松影過窓眠始覺
竹風吹面醉初醒就荷葉上包魚鮮當石渠中浸酒瓶
生計悠悠身兀兀甘從妻喚作劉伶

舟中夜坐

潭邊霽後多清景
橋下涼來足好風
秋鶴一隻船一隻
夜深相伴月明中

戲和微之荅竇七行軍之作

依本韻

旌鉞從橐鞬
賓僚禮數全
夔龍來要地
鵷鷺下遼天
赭汗騎驕馬
青蛾舞醉仙
合成江上作
散到洛中傳
陋巷能無酒
貧池亦有船
春裝秋未寄
謾道有閒錢

閒忙

奔走朝行內棲遲林墅間多因病後退少及健時還斑
白霜侵鬢蒼黃日下山閒忙俱過日忙校不如閒

西風

西風來幾日一葉已先飛新霽乘輕屐初涼換熟衣淺
渠銷慢水疎竹漏斜暉薄暮青苔巷家僮引鶴歸

題西亭

多見朱門富貴人林園未畢即無身我今幸作西亭主
已見池塘五度春

觀游魚

遶池閒步看魚遊
正值兒童弄釣舟
一種愛魚心各異
我來施食爾垂鈎

看採蓮

小桃閒上小蓮船
半採紅蓮半白蓮
不似江南惡風浪
芙蓉池在卧牀前

看採菱

菱池如鏡淨無波
白點花稀青角多
時唱一聲新水調

謾人道是採蓮歌

天老

早世身如風裏燭暮年髮似鏡中絲誰人斷得人間事
少天堪傷老又悲

秋池

洗浪清風透水霜水邊閒坐一繩牀眼塵心垢見皆盡
不是秋池是道場

登天宮閣

午時乘興出薄暮未能還高上烟中閣平看雪後山委
形羣動裏任性一生間洛下多閒客其中我最閒

新雪二首

寄楊舍人

不思北省烟霄地不憶南宮風月天唯憶靜恭楊閣老
小園新雪煖爐前

不思朱雀街東鼓不憶青龍寺後鐘唯憶夜深新雪後
新昌臺上七株松

日高卧

怕寒放懶日高卧臨老誰言牽率身夾幕繞房深似洞
重裯襯枕暖於春小青衣動桃根起嫩綠醅鋪杯切浮竹
葉新未裹頭前傾一盞何如衝雪趨朝人

和微之任校書郎日過三鄉

三鄉過日君年幾今日君年五十餘不獨年催身亦變
校書郎變作尚書

和微之十七與君別及朧月花枝之詠

別時十七今頭白惱亂君心三十年垂老休吟花月句

恐君更結後身緣

和微之歎槿花

朝榮殊可惜暮落實堪嗟若向花中比猶應勝眼花

思往喜今

憶除司馬向江州及此凡經十五秋雖在簪裾從俗累
半尋山水是閒遊謫居終帶鄉關思領郡猶分邦國憂
爭似如今作賓客都無一念到心頭

題平泉薛家雪堆莊

怪石千年應自結靈泉一帶是誰開
感為宛轉青蛇項噴作玲瓏白雪堆
赤日旱天長看雨玄陰臘月亦聞雷
所嗟地去都門遠不得肩舁雲俱切每日來

和微之道保生三日

相看鬢似絲始作弄璋詩且有承家望
誰論得力時莫興三日歎猶勝七年遲
予老微之七歲我未能忘喜君應不合

悲嘉名稱道保乞姓號崔兒但恐持相
並蒹葭瓊樹枝

哭皇甫七郎中

漫

志業過玄宴詞華似禰衡多才非福祿薄命是聰明不
得人間壽還留身後名涉江文一首便可敵公卿

持正
奇文

甚多涉江
一章尤著

晚起

爛熳朝眠後頻伸晚起時
煖爐生火早寒鏡裏頭遲融
雪煎香茗調酥煮乳糜
慵饒還自哂快活亦誰知
酒性溫無毒琴聲淡不悲
榮公三樂外仍弄小男兒

疑夢二首

莫驚寵辱虛憂喜莫計恩讐浪苦辛黃帝孔丘無處問
安知不是夢中身

鹿疑鄭相終難辨蝶化莊生詎可知假使如今不是夢
能長於夢幾多時

夜宴惜別

笙歌旖旎曲終頭轉作離聲滿坐愁箏怨朱絃從此斷
燭啼紅淚為誰流夜長似歲歡宜盡醉未如泥飲莫休
何況雞鳴即須別門前風雨冷修修

歸來二周歲

歸來二周歲二歲似須臾池藕重生葉林鴉再引雛時
豐實倉廩春暖葺庖厨更作三年計三年身健無

吾土

身心安處為吾土豈限長安與洛陽水竹花前謀活計
琴詩酒裏到家鄉榮先生老何妨樂楚接輿歌未必狂
不用將金買莊宅城東無主是春光

題岐王舊山池石壁

樹深藤老竹迴環石壁重重錦翠斑俗客看來猶解愛
忙人到此亦須閒況當霽景涼風後如在千巖萬壑間
黃綺更歸何處去洛陽城內有商山

病眼花

頭風目眩乘衰老祇有增加豈有瘳

傳云有加而無瘳花發眼

中猶足怪柳生肘上亦須休大窠羅綺看纔辨小字文
書見便愁必若不能分黑白却應無悔復無尤

早飲醉中除河南尹敕到

雪擁衡門水滿池
溫爐夕後煖
寒時綠醅新
耐嘗初醉
黃紙除書到
不知厚俸自來誠
忝溫老身
欲起尚遲疑
應須了却丘中計
女嫁男婚三逕資

除夜

病眼少眠非守歲
老心多感又臨春
火銷燈盡天明後
便是平頭六十人

府西池

柳無氣力枝先動
池有波紋冰盡開
今日不知誰計會

春風春水一時來

天津橋

津橋東北斗亭西到此令人詩思迷
眉月晚生神女浦
臉波春傍窈娘堤
柳絲嫋嫋風縹緲
出草縷茸茸雨剪齊
報道前驅少呼喝
恐驚黃鳥不成啼

不准擬二首

藍輦騰騰一老夫
褐裘烏帽白髭鬚
早衰饒病多蔬食
筋力消磨合有無
不准擬身年六十
上山仍未要人扶

又

憶昔謫居炎瘴地巴猿引哭虎隨行多於賈誼長沙苦

予自左遷江
峽凡經七年

小校潘安白髮生不準擬身年六十遊春

猶自有心情

府中夜賞

櫻桃廳院春偏好石井欄堂夜更幽白粉牆頭花半出
緋紗燭下水平流閒留賓客嘗新酒醉領笙歌上小舟
舞袖颼颼棹容與忽疑身是夢中遊

府西池北新葺水齋即事招賓偶題十六韻

繚繞府西面潺湲池北頭鑿開明月峽決破白蘋洲清
淺漪瀾急寅緣浦嶼幽直衝行徑斷平入卧齋流石疊
青稜玉波翻白片鷗噴時千點雨澄處一泓油絕境應
難別同心豈易求少逢人愛翫多是我淹留夾岸鋪長
簟當軒泊小舟枕前看鶴浴牀下見魚遊洞戶斜開扇
疎簾半上鉤紫浮萍泛泛碧亞竹修修讀罷書仍展碁
終局未收午茶能散睡卯酒善消愁簷雨晚初霽窓風

涼欲休誰能伴老尹時復一閒遊

哭崔兒

掌珠一顆兒三歲鬢雪千莖父六旬豈料汝先為異物
常憂吾不見成人悲腸自斷非因劍啼眼加昏不是塵
懷抱又空天默默依前重作鄧攸身

初喪崔兒報微之晦叔

書報微之晦叔知欲題崔字淚先垂世間此恨偏敦我
敦音堆天下何人不哭兒蟬老悲鳴拋蛻後龍眠驚覺
見詩注

失珠時文章千帙官三品身後傳誰庇廕誰

府齋感懷酬夢得

時初喪崔兒夢得以詩相安云從此期君比瓊樹一枝吹

折一枝生故有此落句以報之

府伶呼喚爭先到家醞提攜動輒隨合是人生開眼日
自當年老斂眉時丹砂鍊作三銖土玄髮看成一把絲
勞寄新詩遠安慰不聞枯樹更生枝

齋居

香火多相對葷腥久不嘗黃著數匙粥赤箭一甌湯厚

俸將何用閒居不可忘明年官滿後擬買雪堆莊

與諸道者同遊二室至九龍潭作

喜逢二室遊仙子厭作三川守土臣舉首摩挲潭上石
開襟抖擻府中塵他日終為獨往客今朝未是自由身
若言尹是嵩山主三十六峯應笑人

履道池上作

家池動作經旬別松竹琴魚好在無樹暗小巢藏巧婦
渠荒新葉長慈姑不因車馬時時到豈覺林園日日蕪

猶喜春深公事少每來花下得踟躕

六十拜河南尹

六十河南尹前途足可知老應無處避病不與人期幸
遇芳菲日猶當强健時萬金何假藉一盞莫推辭流水
光陰急浮雲富貴遲人間若無酒盡合鬢成絲

重修府西水亭院

因下疏為沼隨高築作臺龍門分水入金谷取花栽遶
岸行初匝憑軒立未迴園西有池位留與後人開

與諸公同出城觀稼

老尹醉醺醺來隨年少羣不憂頭似雪但喜稼如雲
歲望千箱積秋憐五穀分何人知帝力堯舜正為君

水堂醉卧問杜三十一

聞君洛下住多年何處春流最可憐為問魏王堤岸下
何如同德寺門前無妨水色堪閒翫不得泉聲伴醉眠
那似此堂簾幕底連明連夜碧潺湲

歲暮言懷

職與才相背心將口自言磨鉛教切玉驅鴈遣乘軒只
合居巖窟何因入府門年終若無替轉恐負君恩

座中戲呈諸少年

衰容禁得無多酒秋鬢新添幾許霜縱有風情應淡薄
假如老健莫誇張興來吟詠從成癖飲後酣歌少放狂
不為倚官兼挾勢因何入得少年場

雪後早過天津橋偶呈諸客

官橋晴雪曉
我我老尹行吟獨一過
紫綬相輝應不惡

白鬚同色復如何
悠揚短景凋年急
牢落衰情感事多
猶賴洛中饒醉客
時時泥我喚笙歌

新製綾襖成感而有詠

水波文襖造新成
綾軟繅勻溫復輕
晨興好擁向陽坐
晚出宜披蹋雪行
鶴氅毳疎無實事
木棉花冷得虛名
宴安往往歡侵夜
卧穩昏昏睡到明
百姓多寒無可救
一身獨暖亦何情
心中為念農桑苦
耳裏時聞飢凍聲
爭得大裘長萬丈
與君都蓋洛陽城

早春雪後贈洛陽李長官鄭明府二同年

獻歲晴和風景新
銅駝街郭暖無塵
府亭共賀三川雪
縣道分行百里春
朱紱洛陽官位屈
青袍長水俸錢貧
有何功德紆金紫
若比同年是幸人

醉吟

七

醉來忘渴復忘饑
冠帶形骸杳若遺
耳底齋鐘初過後
心頭卯酒未消時
臨風朗詠從人聽
看雪閒行任馬遲
應被衆疑公事慢
承前府尹不吟詩

府酒五絕

變法

自慙到府來周歲
惠愛威稜一事無
唯是改張官酒法
漸從濁水作醍醐

招客

日午微風且暮寒
春風冷峭雪乾殘
碧氈帳下紅爐畔
試為來嘗一盞看

辨味

甘露太甜非正味醴泉雖潔不芳馨
盃中此物何人別
柔旨之中有典刑

自勸

憶昔羈貧應舉年脫衣典酒曲江邊
十千一斗猶賒飲
何況官供不著錢

諭妓

燭淚夜粘桃葉袖酒痕春污石榴裙
莫辭辛苦供歡宴
老後思量悔煞君

晚歸早出

筋力年年減風光日日新
退衙歸逼夜拜表出侵晨
何處臺無月誰家池不春
莫言無勝地自是少閒人
坐厭推囚案行嫌引馬塵
幾時辭府印却作自由身

南龍興寺殘雪

南龍興寺春晴後緩步徐吟遶四廊
老趣風花應不稱閒尋松雪正相當
吏人引從多乘輦賓客逢迎少下堂
不擬人間更求事些些疎懶亦何妨

天宮閣早春

天宮高閣上何頻，每上令人耳目新。
前日晚登緣看雪，今朝晴望為迎春。
林鶯何處吟箏柱，墻柳誰家曬麴塵。
可惜三川虛作主，風光不屬白頭人。

履道居三首

莫嫌地窄林亭小，莫厭貧家活計微。
大有高門鑠寬宅，主人到老不曾歸。

東里素帷猶未徹，南隣丹旆又新懸。
衡門蝸舍自慙愧。

收得身來已五年

世事平分衆所知何嘗苦樂不相隨
唯餘耽酒狂歌客只有樂時無苦時

和夢得冬日晨興

漏傳初五點雞報第三聲
帳下從容起窓間矐眈

呼骨切

明照書燈未滅煖酒火重生理曲絃歌動先聞唱渭城
雪夜對酒招客

帳小青氍暖盃香綠蟻新醉憐今夜月歡憶去年人
閣

落燈花燼閒生草
座塵慙懃報絃
管明日有嘉賓

贈晦叔憶夢得

自別崔公四五秋
因何臨老轉風流
歸來不說秦中事
歇定唯謀洛下遊
酒面浮花應是喜
歌眉斂黛不關愁
得君更有無厭意
猶恨樽前欠老劉

醉後重贈晦叔

老伴知君少歡情
向我偏無論疎與數
相見輒欣然各
以詩成癖俱因酒得
仙笑迴青眼語醉並
白頭眠豈是

今投分多疑宿結緣人間更何事攜手送衰年

睡覺

星河耿耿漏緜緜月闇燈微欲曙天轉枕頻伸書帳下
披裘箕踞火爐前老眠早覺常殘夜病力先衰不待年
五欲已銷諸念息世間無境可勾牽

白氏長慶集卷二十八

欽定四庫全書薈要卷一萬三千九百五十九

集部

白氏長慶集卷二十九

唐白居易撰

格詩凡四十七首

詠興五首

并序

七年四月予罷河南府歸履道第廬舍自給衣儲自充
無欲無營或歌或舞頽然自適蓋河洛間一幸人也遇
興發詠偶成五章各以首句命為題目

解印出公府

解印出公府，抖擻塵土衣。
百吏放爾散，雙鶴隨我歸。
歸來履道宅，下馬入柴扉。
馬嘶返舊櫪，鶴舞還故池。
雞犬何忻忻，隣里亦依依。
年顏老去日，生計勝前時。
有帛禦冬寒，有穀防歲飢。
飽於東方朔，樂於榮啟期。
人生且如此，此外吾不知。

出府歸吾廬

出府歸吾廬，靜然安且逸。
更無客干謁，時有僧問疾。
家

僮十餘人，櫪馬三四匹，慵發經旬，卧興來，連日出遊。
愛何處，嵩碧伊瑟瑟，況有清和天，正當疎散日，身閒自
為貴，何必居榮秩，心足即非貧，豈唯金滿室，吾觀權勢
者，苦以身徇物，炙手外，炎炎履冰中，慄慄朝饑，口忘味
夕，惕心憂失，但有富貴名，而無富貴實。

池上有小舟

池上有小舟，舟中有胡牀，牀前有新酒，獨酌還獨嘗。
熏風若春日，氣皎如秋水，光可洗機巧，心可蕩塵垢。
腸岸曲。

舟行遲一曲進一觴未知幾曲醉醉入無何鄉
寅緣潭島間水竹深青蒼身閒心無事白日為我長
我若未忘世雖閒心亦忙世若未忘我雖退身難藏
我今異於是身世交相忘

四月池水滿

四月池水滿龜游魚躍出吾亦愛吾池池邊開一室人
魚雖異族其樂歸於一且與爾為徒逍遙同過日爾無
羨滄海蒲藻可委質吾亦忘青雲衡茅足容膝況吾與

爾輩本非蛟龍匹假如雲雨來祇是池中物

小庭亦有月

小庭亦有月小院亦有花可憐好風景不解嫌貧家菱

角執笙簧谷兒抹琵琶紅綃信手舞紫綃隨意歌

菱谷紫紅

皆小藏獲名也

村歌與社舞客哂主人誇但問樂不樂豈在鐘

鼓多客告暮將歸主稱日未斜請客稍深酌願見朱顏

酡客知主意厚分數隨後加堂上燭未秉座中冠已裁

左顧短紅袖右命小青蛾長跪謝貴客蓬門勞見過客

散有餘興醉卧獨吟哦幕天而席地誰奈劉伶何

秋涼閒卧

殘暑晝猶長早涼秋尚嫩露荷散清香風竹含疎韻幽閒竟日卧衰病無人問薄暮宅門前槐花深一寸

酬思黯相公見過弊居戲贈

軒蓋光照地行人為徘徊呼傳君子出乃是故人來訪我入窮巷引君登小臺臺前多竹樹池上無塵埃貧家何所有新酒三兩盃款曲語上馬從容復遲迴留守不

外宿日斜宮漏催但留金刀贈未接玉山頽家醞不敢
惜待君來即開村妓不辭出恐君羶

丑忍切
大笑也

然哈

呼來切

再授賓客分司

優穩四皓官清崇三品列伊予再塵忝內愧非才哲俸
錢七八萬給受無虛月分命在東司又不勞朝謁既資
閒養疾亦賴慵藏拙賓友得從容琴觴恣怡悅乘籃城
中去繫馬花前歇六遊金谷春五看龍門雪吾若默無
語安知吾快活吾欲更盡言復恐人豪奪應為時所笑

古惜分司闕但問適意無豈論官冷熱

把酒

把酒仰問天古今誰不死所貴未死間少憂多歡喜窮
通諒在天憂喜即由已是故達道人去彼而取此勿言
未富貴久忝居祿仕借問宗族間幾人拖金紫勿憂漸
衰老且喜加年紀試數班行中幾人及暮齒朝飧不過
飽五鼎徒為爾夕寢止求安一衾而已矣此外皆長物
於我雲相似有子不留金何況兼無子

首夏

林靜蚊未生
池靜蛙未鳴
景長天氣好
竟日和且清
春禽餘哢在
夏木新陰成
兀爾水邊坐
翛然橋上行
自問一何適
身閒官不輕
料錢隨月用
生計逐日營
食飽慙伯夷
酒足愧淵明

陶潛詩云飲酒常不足

壽倍顏氏子
富百黔婁

生有一即為樂
况吾四者并
所以私自慰
雖老有心情

代鶴

我本海上鶴
偶逢江南客
感君一顧恩
同來洛陽陌
洛

陽寡族類皎皎唯兩翼貌是天與高色非日浴白主人
誠可戀其奈軒庭窄飲啄雜雞羣年深損標格故鄉渺
何處雲水重重隔誰念深籠中七換摩天翮

立秋夕有懷夢得

露簾荻竹青風扇蒲葵輕一與故人別再見新蟬鳴是
夕涼颼起閒境入幽情迴燈見棲鶴隔竹聞吹笙夜茶
一兩杓秋吟三數聲所思渺千里雲水長洲城

哭崔常侍晦叔

頑賤一拳石精珍百鍊金名價既相遠交分何其深中
誠一以合外物不能侵逶迤二十年與世同浮沉晚有
退閒約白首歸雲林垂老忽相失悲哉口語心春日高
高陽秋夜清洛陰丘園共誰卜山水共誰尋風月共誰
賞詩篇共誰吟花開共誰看酒熟共誰斟惠死莊杜口
鍾歿師廢琴道理使之然從古非獨今吾道自此孤我
情安可任唯將病眼淚一灑秋風襟

新秋曉興

濁暑忽已退清宵未全長晨釭耿殘焰宿閣凝微香喔
喔雞下樹輝輝日上梁枕低茵席軟卧穩身入牀睡足
景猶早起初風乍涼展張小屏障收拾生衣裳還有惆
悵事遲遲未能忘拂鏡梳白髮可憐冰照霜

秋日與張賓客舒著作同遊龍門醉中狂歌凡

二百三十八字

秋天高高秋光清秋風嫋嫋秋蟲鳴嵩峯餘霞錦綺卷
伊水細浪鱗甲生洛陽間客知無數少出遊山多在城

商嶺老人自追逐蓬丘逸士相逢迎南出鼎門十八里
莊店邈迤橋道平不寒不熱好時節鞍馬穩快衣衫輕
並轡踟躕下西岸扣舷容與遶中汀開懷曠達無所繫
觸目勝絕不可名荷衰欲黃荇猶綠魚樂自躍鷗不驚
翠藻蔓長孔雀尾彩船櫓急寒鴈聲家醞一壺白玉液
野花數把黃金英晝遊四看西日暮夜話三及東方明
暫停杯觴輟吟詠我有狂言君試聽丈夫一生有二志
兼濟獨善難得并不能救療生民病即須先濯塵土纓

况吾頭白眼已闇終日戚促何所成不如展眉開口笑
龍門醉卧香山行

履信池櫻桃島上醉後走筆送別舒員外兼寄
宗正李卿考功崔郎中

櫻桃島前春去春花萬枝忽憶與宗卿閒飲日又憶與
考功狂醉時歲晚無花空有葉風吹滿地乾重疊蹋葉
悲秋復憶春池邊樹下重殷勤今朝一酌臨寒水此地
三迴別故人櫻桃花來春千萬朶來春共誰花下坐不

論崔李上青雲明日舒三亦拋我

秋池獨泛

蕭疎秋竹籬清淺秋風池一隻短舫艇一張斑鹿皮皮
上有野叟手中持酒卮半酣箕踞坐自問身為誰嚴子
垂釣日蘇門長嘯時悠然意自得意外何人知

冬日早起閒詠

冰塘耀初旭風竹飄餘霰幽境雖目前不因閒不見晨
起對爐香道經尋兩卷晚坐拂琴塵秋思彈一遍此外

更無事開樽時自勸何必東風來一盃春上面

歲暮

慘澹歲云暮窮陰動經旬霜風裂人面冰雪摧車輪而
我當是時獨不知苦辛晨炊廩有米夕爨厨有薪夾帽
長覆耳重裘寬裹身加之一盃酒煦嫗如陽春洛城士
與庶比屋多饑貧何處爐有火誰家甑無塵如我飽煖
者百人無一人安得不慙愧放歌聊自陳

南池早春有懷

朝遊北橋上晚憇南塘畔西日雪全消東風冰盡泮篴

篴

申之切

魚尾掉瞥瞥

匹滅切

鵝毛換泥暖草芽生沙虛泉

脈散晴芳冒苔島宿潤侵蒲岸洛下日初長江南春欲
半時光共拋擲人事堪嗟歎倚棹忽尋思去年池上伴

古意

脈脈復脈脈美人千里隔不見來幾時瑤草三四碧玉
琴聲悄悄鸞鏡塵幕幕昔為連理枝今作分飛翮寄書
多不達加飯終無益心腸不自寬衣帶何由窄

山遊示小妓

雙鬟垂未合三十纔過半本是綺羅人今為山水伴春
泉共揮弄好樹同攀翫笑容花底迷酒思風前亂紅凝
舞袖急黛慘歌聲緩莫唱楊柳枝無腸與君斷

神照禪師同宿

八年三月晦山梨花滿枝龍門水西寺夜與遠公期晏
坐自相對密語誰得知前後際斷處一念不生時

張常侍相訪

西亭晚寂寞鷺散柳陰繁水戶簾不卷風牀席自翻忽
聞車馬客來訪蓬蒿門况是張常侍安得不開樽

早夏遊宴

雖慵興猶在雖老心猶健昨日山水遊今日花酒宴山
榴艷似火玉蘂飄如霰榮落逐瞬遷炎涼隨刻變未收
木綿褥已動蒲葵扇且喜物與人年年得相見

感白蓮花

白白芙蓉花本生吳江漬不與紅者雜色類自區分誰

移爾至此姑蘇白使君初來苦顛顛久乃芳氤氲月月
葉換葉年年根生根陳根與故葉銷化成泥塵化者日
已遠來者日復新一為池中物永別江南春忽想西涼
州中有天寶民埋沒漢父祖孳生胡子孫已忘鄉土戀
豈念君親恩生人尚復爾草木何足云

詠所樂

獸樂在山谷魚樂在陂池蟲樂在深草鳥樂在高枝所
樂雖不同同歸適其宜不以彼易此况論是與非而我

何所樂所樂在分司分司有何樂樂哉人不知官優有
祿料職散無羈縻懶與道相近鈍將閒自隨昨朝拜表
迴今晚行香歸歸來北窓下解巾脫塵衣冷泉灌我頂
暖水濯四肢體中幸無疾卧任清風吹心中又無事坐
任白日移或開書一篇或引酒一卮但得如今日終身
無厭時

思舊

閒日一思舊舊遊如目前再思今何在零落歸下泉退

之服硫黃一病訖不痊微之鍊秋石未老身溘然杜子
得丹訣終日斷腥羶崔君誇藥力經冬不衣綿或疾或
暴天悉不過中年唯予不服食老命反遲延況在少壯
時亦為嗜慾牽但耽葷與血不識承胡孔切與鉛饑來吞
熱物渴來飲寒泉詩役五臟神酒汨三丹田隨日合破
壞至今粗完全齒牙未缺落肢體尚輕便已開第七秩
飽食仍安眠且進盃中物其餘皆付天

寄盧少卿

老誨心不亂莊戒形太勞生命既能保死籍亦可逃嘉
肴與旨酒信是腐腸膏艷聲與麗色真為伐性刀補養
在積功如裘集衆毛將欲致十里可得差一毫

心不亂
形太勞

至差一毫皆出老莊
及諸道書仙方禁誡

顏回何為者簞瓢纔自給肥醲不

到口年不登三十張蒼何為者染愛浩無際妾媵填後
房竟壽百餘歲蒼壽有何德回夭有何辜誰謂具聖體
不如肥瓠軀遂使世俗心多疑仙道書寄問盧先生此
理當何如

池上清晨候皇甫郎中

曉景麗未熱晨飈鮮且涼
池幽綠蘋合霜潔白蓮香
深掃竹間逕靜拂松下牀
玉柄鶴翎扇銀鸞雲母漿
屏除無俗物瞻望唯清光
何人擬相訪羸女從蕭郎

詠懷

我知世無幻了無干世意
世知我無堪亦無責我事由
茲兩相忘因得長自遂
自遂意何如閒官在閒地
閒地唯東都東都少名利
閒官是賓客賓客無牽累
嵇康曰

日懶畢卓時時醉酒肆夜深歸僧房日高睡形安不勞
苦神泰無憂畏從官三十年無如今氣味鴻雖脫羅弋
鶴尚居祿位唯此未忘懷有時猶內愧

北窓三友

今日北窓下自問何所為欣然得三友三友者為誰琴
罷輒舉酒酒罷輒吟詩三友遞相引循環無已時一彈
恆中心一詠暢四肢猶恐中有閒以醉彌縫之豈獨吾
拙好古人多若斯嗜詩有淵明嗜琴有啟期嗜酒有伯

倫三人皆吾師或乏儋石儲或穿帶索衣絃歌復觴詠
樂道知所歸三師去已遠高風不可追三友游甚熟無
日不相隨左擲白玉卮右拂黃金徽興酣不疊紙走筆
操狂詞誰能持此詞為我謝親知縱未以為是豈以我
為非

吟四雖雜言

酒酣後歌歇時請君添一酌聽我吟四雖年雖老猶少
於韋長史命雖薄猶勝於鄭長水眼雖病猶明於徐郎

中家雖貧猶富於郭庶子省躬審分何僥倖值酒逢歌

且歡喜忘榮知足委天和亦應得盡生生理

分司同官
中韋長史

續年七十餘郭庶子求貧苦最甚徐郎中晦因疾喪明予為河南尹時見同年鄭俞始及長水縣令因歎四子而成此篇也

裴侍中晉公以集賢林亭即事詩二十六韻見

贈猥蒙徵和才拙詞繁輒廣為五百言以伸

酬獻

三江路千里五湖天一涯何如集賢地中有平津池

勝主見覺景新人未知竹森翠琅玕水深洞琉璃水竹
以為質質立而文隨文之者何人公來親指麾疏鑿出
人意結構得地宜靈襟一搜索勝槩無遁遺因下張沼
沚依高築階基嵩峯見數片伊水分一支南溪修且直
長波碧逶迤北館壯復麗倒影紅參差東島號晨光泉
曜迎朝曦西嶺名夕陽香暖留落暉前有水心亭動蕩
架漣漪後有開闔室寒溫變天時幽泉鏡泓澄怪石山
敵危春葩雪漠漠夏果珠離離主人命方舟宛在水中

坻親賓次第至酒樂前後施解纜始登汎山遊仍水嬉
泂洄無滯礙向背窮幽竒瞥過遠橋下飄旋深澗陲管
絃去縹緲綺羅來霏微棹風逐舞迴梁塵隨歌飛宴餘
日云暮醉客未放歸高聲索彩牋大笑催金卮唱和筆
走疾問荅盃行遲一詠清兩耳一酣暢四肢主客忘貴
賤不知俱是誰客有詩魔者吟哦不知疲乞公殘紙墨
一掃狂歌詞維云社稷臣赫赫文武姿十授丞相印五
建大將旗四朝致勛華一身冠臯夔去年才七十決赴

懸車期公志不可奪君恩亦難希從容就中道俛僊來
保釐貂蟬雖未脫鸞鳳已不羈歷徵今與古獨步無等
夷陸賈功業少二疎官秩卑乘舟范蠡懼辟穀留侯饑
豈若公今日身安家國肥羊祜在漢南空留峴首碑柳
惲在江南秣賦汀洲詩謝安入東山但說攜蛾眉山簡
醉高陽唯聞倒接羅豈如公今日餘力兼有之願公壽
如山安樂長在茲願我比蒲稗永得相因依

謝靈運詩
云蒲稗相

晚歸香山寺因詠所懷

我年日已老我身日已閒閒出都門望但見水與山關
塞碧巖巖伊流清潺潺中有古精舍軒戶無扃關岸草
歇可藉逕蘿行可攀朝隨浮雲出夕與飛鳥還吾道本
迂拙世途多險艱嘗聞嵇呂輩尤悔生疎頑巢悟入箕
潁皓知返商巔豈唯樂肥遁聊復祛憂患吾亦從此去
終老伊嵩間

張常侍池涼夜閒讌贈諸公

竹橋新月上水岸涼風至對月五六人管絃三兩事留
連池上酌款曲城外意或嘯或嘔吟誰知此閒味迴看
市朝客砵砵趨名利朝忙少遊宴夕困多眠睡清涼屬
吾徒相逢勿辭醉

和皇甫郎中秋曉同登天宮閣言懷六韻

碧天忽已高白日猶未短玲瓏曉樓閣清脆秋絲管張
翰一盃酣嵇康終日懶塵中足憂累雲外多疎散病木
斧斤遺冥鴻羈縶斷逍遙二三子永願為閒伴

送呂漳州

今朝一壺酒言送漳州牧半自要閒遊愛花憐草綠花
前下鞍馬草上攜絲竹行客飲數盃主人歌一曲端居
惜風景屢出勞僮僕獨醉似無名借君作題目

短歌行

世人求富貴多為身嗜欲盛衰不自由得失常相逐問
君少年日苦學將干祿負笈塵中遊抱書雪前宿布衾
不周體藜茹纔充腹三十登官途五十被朝服奴溫已

挾纊馬肥初食粟未敢議歡遊尚為名檢束耳目聾閤
後堂上調絲竹牙齒缺落時盤中堆酒肉彼來此已去
外餘中不足少壯與榮華相避如寒燠青雲去地遠白
日終天速從古無奈何短歌聽一曲

詠懷

高人樂丘園中人慕官職一事尚難成兩途安可得
遑干世者多苦時命塞亦有愛閒人又為窮餓逼我今
幸雙遂祿仕兼游息未嘗羨榮華不省勞心力妻孥與

婢僕亦免愁衣食所以吾一家面無憂喜色

府西亭納涼歸

避暑府西亭晚歸有閒思夏淺蟬未多綠槐陰滿地帶
寬衫解領馬穩人攏轡面上有涼風眼前無俗事路經
府門過落日照官次牽聯縲紲囚奔走塵埃吏低眉悄
不語誰復知茲意憶得五年前晚衙時氣味

老熱

一飽百情足一酣萬事休何人不衰老我老心無憂仕

者拘職役農者勞田疇何人不苦熱我熱身自由卧風
北窓下坐月南池頭腦涼脫烏帽足熱濯清流慵發晝
高枕興來夜汎舟何乃有餘適祇緣無過求或問諸親
友樂天是與不亦無別言語多道天悠悠悠悠君不知
此味深且幽但恐君知後亦來從我遊

新秋喜涼因寄兵部楊侍郎

外强火未退中銳金方戰一夕風雨來炎涼隨數變徐
徐炎景度稍稍涼飈扇枕簟忽淒清巾裳亦輕健老夫

納秋候心體殊安便睡足一屈伸搔首摩浮面褰簾對
池竹幽寂如僧院俯觀遊魚羣仰數浮雲片閒忙各有
趣彼此寧相見昨日聞幕巢召對延英殿

懶放二首呈劉夢得吳方之

青衣報平旦呼我起鹽櫛令早天氣寒郎君應不出又
無賓客至何以銷閒日已向微陽前暖酒開詩帙
朝憐一牀日暮愛一爐火牀暖日高眠爐溫夜深坐雀
羅門懶出鶴髮頭慵裹除却劉與吳何人來問我

六十六

病知心力減老覺光陰速五十八歸來今年六十六鬢
絲千萬白池草八九綠童稚盡成人園林半喬木看山
倚高石引水穿深竹雖有潺湲聲至今聽不足

三適贈道友

褐綾袍厚暖卧蓋行坐披紫氍履寬穩蹇步頗相宜足
適已忘履身適已忘衣况我心又適兼忘是與非三適
今為一怡怡復熙熙禪那不動處混沌未鑿時此固不

可說為君強言之

洛陽春贈劉李二賓客

齊梁格

水南冠蓋地城東桃李園雪消洛陽堰春入永通門淑
景方靄靄遊人稍喧喧年豐酒漿賤日晏歌吹繁中有
老朝客華髮映朱軒從容三兩人藉草開一樽樽前春
可惜身外事勿論明日期何處杏花遊趙村

洛城東有
趙村杏花

千餘
樹

寒食

人老何所樂樂在歸鄉國我歸故園來九度逢寒食故
園在何處池館東城側四隣梨花時二月伊水色豈獨
好風生仍多舊親戚出去恣歡遊歸來聊燕息有官供
祿俸無事勞心力但恐優穩多微躬銷不得

和裴令公一日日一年年雜言見贈

一日日作老翁一年年過春風公心不以貴隔我我散
唯將閒伴公我無才能忝高秩合是人間閒散物公有
功德在生民何因得作自由身前日魏王潭上宴連夜

今日午橋池頭遊拂晨山客硯前吟待月野人樽前醉
送春不敢與公閒中爭第一亦應占得第二第三人



白氏長慶集卷二十九



總校官庶吉士臣張能照
校對官庶吉士臣何思鈞
騰錄監生臣茹灃

欽定四庫全書薈要

集部

白氏長慶集卷

三十一

詳校官助教臣常循



欽定四庫全書薈要卷一萬三千九百六十

集部

白氏長慶集卷三十

唐白居易撰

格詩

凡四十七首

題裴晉公女几山刻石詩後

并序

裴侍中晉公出討淮西時過女几山下刻石題詩末句
云待平賊壘報天子莫指仙山示武夫果如所言剋期
平賊由是淮蔡迄今底寧殆二十年人安生業夫嗟歎

不足則詠歌之故居易作詩二百言繼題公之篇末欲使採詩者修史者後之往來觀者知公之功德本末前後也

何處畫功業何處題詩篇麒麟高閣上女几小山前爾後多少時四朝二十年賊骨化為土賊壘犁為田一從賊壘平陳蔡民晏然騾軍成牛戶

蔡寇號騾子軍陳蔡間農曉銳者人畜牛

皆呼為牛戶

鬼火變人煙生子已嫁娶種桑亦絲繭皆云公

之德欲報無由緣公今在何處守都鎮三川舊宅留永

樂新居開集賢公今在何官被袞珥貂蟬戰袍破猶在
髀肉生欲圓襟懷轉瀟灑氣力彌精堅登山不拄杖上
馬能掉鞭利澤浸入地福降自昇天昔號天下將今稱
地上仙勿追赤松遊勿拍洪崖肩商山有遺老可以奉
周旋

洛陽有愚叟

洛陽有愚叟白黑無分別浪跡雖似狂謀身亦不拙點
檢盤中飯非精亦非糲郎達切點檢身上衣無餘亦無闕

天時方得所不寒復不熱體氣正調和不飢仍不渴閒
將酒壺出醉向人家歇野食或烹鮮寓眠多擁褐抱琴
榮啟樂荷鍾劉伶達放眼看青山任頭生白髮不知天
地內更得幾年活從此到終身盡為閒日月

飽食閒坐

紅粒陸渾稻白鱗伊水魴庖童呼我食飯熟魚鮮香筋
筋適我口匙匙充我腸八珍與五鼎無復心思量捫腹
起盥漱下階振衣裳遶亭行數匝却上簷下床箕踞擁

裘坐半身向日暘可憐飽暖味誰肯來同嘗是歲大和
八兵銷時漸康朝廷重經術草澤搜賢良堯舜求理切
夔龍啟沃忙懷才抱智者無不走遑遑唯此不才叟頑
慵戀洛陽飽食不出門閒坐不下堂子弟多寂寞僮僕
少精光衣食雖充給神意不揚揚為爾謀則短為吾謀
甚長

閒居自題

門前有流水牆上多高樹竹逕遶荷池縈廻百餘步波

閒戲魚鼈風靜下鷗鷺寂無城市喧渺有江湖趣吾廬
在其上偃卧朝復暮洛下安一居山中亦慵去時逢過
客愛問是誰家住此是白家翁閉門終老處

覽鏡喜老

今朝覽明鏡鬚鬢盡成絲行年六十四安得不衰羸親
屬惜我老相顧興歎咨而我獨微笑此意何人知笑罷
仍命酒掩鏡捋白髭爾輩且安坐從容聽我詞生若不
足戀老亦何足悲生若苟可戀老即生多時不老即須

天不夭即須衰晚衰勝早夭此理決不疑古人亦有言
浮生七十稀我今欠六歲多幸或庶幾儻得及此限何
羨榮啟期當喜不當歎更傾酒一巵

風雪中作

歲暮風動地夜寒雪連天老夫何處宿煖帳溫爐前兩
重褐綺衾一領花叢氈粥熟呼不起日高安穩眠是時
心與身了無閒事牽以此度風雪閒居來六年忽思遠
遊客復想早朝士跼凍侵夜行凌寒未明起心為身君

父身為心臣子不得身自由皆為心所使我心既知足
我身自安止方寸語形骸我應不負爾

對琴酒

西牕明且暖晚坐卷書帷琴匣拂開後酒瓶添滿時
樽白螺盞玉軫黃金徽未及彈與酌相對已依依泠泠
秋泉韻貯在龍鳳池油油春雲心一杯可致之自古有
琴酒得此味者稀祇應康與籍及我三心知

雪中晏起偶詠所懷兼呈張常侍韋庶子皇甫

郎中雜言

窮陰蒼蒼雪雰雰雪深沒脰泥埋輪東家典錢歸礙夜
南家貫米出凌晨我獨何者無此弊複帳重衾暖若春
怕寒放懶不肯動日高睡足方頻伸瓶中有酒爐有炭
甕中有飯庖有薪奴溫婢飽身晏起致茲快活良有因
上無臯陶伯益廊廟材的不能匡君輔國活生民下無
巢父許由箕潁操又不能食薇飲水自苦辛君不見南
山悠悠多白雲又不見西京浩浩唯紅塵紅塵鬧熱白

雲冷好於冷熱中間安置身三年徵倖泰洛尹兩任優
穩為商賈非賢非愚非智慧不貴不富不賤貧冉冉老
去過六十騰騰閒來經七春不知張韋與皇甫私喚我
作何如人

和裴侍中南園靜興見示

池館清且幽高懷亦如此有時簾動風盡日橋照水靜
將鶴為伴閒與雲相似何必學留侯崎嶇覓松子

春寒

今朝春氣寒自問何所欲酥煖薤白酒乳和地黃粥豈
唯厭饒口亦可調病腹助酌有枯魚佐飧兼旨蓄省躬
念前哲醉飽多慚忸君不聞靖節先生樽長空廣文先
生飯不足

菩提寺上方晚望香山寺寄舒員外

晚登西寶刹晴望東精舍反照轉樓臺輝輝似圖畫冰
浮水明滅雪壓松偃亞石閣僧上來雲汀鴈飛下西京
開於市東洛閒如社曾憶舊遊無香山明月夜

二月一日作贈韋七庶子

園杏紅萼拆庭蘭紫芽出不覺春已深今朝二月一去
冬病瘡痂將養遵醫術今春入道場清淨依僧律嘗聞
聖賢語所慎齋與疾遂使愛酒人停杯一百日明朝二
月二疾平齋復畢應須挈一壺尋花覓韋七

犬鵲

晚來天氣好散步中門前門前何所有偶覩犬與鵲
飽凌風飛犬暖向日眠腹舒穩貼地翅凝去聲高摩天上

無羅弋憂下無羈鎖牽見彼物遂性我亦心適然心適
復何為一詠逍遙篇此仍著於適尚未能忘言

夢劉二十八因詩問之

昨夜夢夢得初覺思踟躕忽忘來汝郡猶疑在吳都吳
都三千里汝郡二百餘非夢亦不見近與遠何殊尚能
齊近遠焉用論榮枯但問寢與食近日兩何如病後能
吟否春來曾醉無樓臺與風景汝又何如蘇相思一相
報勿復慵為書

閒吟

貧窮汲汲求衣食富貴營營役心力人生不富即貧窮
光陰易過閒難得我今幸在窮富間雖在朝廷不入山
看雪尋花翫風月洛陽城裏七年閒

西行

衣裘不單薄車馬不羸弱藹藹三月天閒行亦不惡壽
安流水館硤石青山郭官道柳陰陰行宮花漠漠常聞
俗閒語有錢在處樂我雖非富人亦不苦寂寞家僮解

絃管騎從攜盃杓時向春風前歇鞍開一酌

東歸

翩翩平肩輿中有醉老夫膝上展詩卷竿頭懸酒壺食
宿無定程僕馬多緩驅臨水歇半日望山傾一盃藉草

坐冤哉

並上聲

攀花行踟躕風將景共暖體與心同舒始

悟有營者居家如在途方知無繫者在道如安居前夕

宿三堂

三堂在號

今旦游申湖

申湖在陝

殘春三百里送我歸東

都

途中作

早起上肩輿一盃平旦醉晚憇下肩舁一覺殘春睡身
不經營物心不思量事但恐綺與里只如吾氣味

小臺

新樹低如帳小臺平似掌六尺白藤牀一莖青竹杖風
飄竹皮落苔印鶴迹上幽境與誰同閒人自來往

睡後茶興憶楊同州

昨晚飲太多寃我

並上聲

連宵醉今朝飧又飽爛熯移時

睡睡足摩挲眼眼前無一事信脚遠池行偶然得幽致
婆娑綠陰樹斑駁青苔地此處置繩牀傍邊洗茶器白
瓷甌甚潔紅爐炭方熾沫下麴塵香花浮魚眼沸盛來
有佳色燕罷餘芳氣不見楊幕巢誰人知此味

題文集櫃

破柏作書櫃櫃牢柏復堅收貯誰家集題云白樂天我
生業文字自幼及老年前有七十卷小大三千篇誠知
終散失未忍遽棄捐自開自鑰閉置在書帷前身是鄧

伯道世無王仲宣只應分付女留與外孫傳

旱熱二首

彤雲散不雨赫日吁可畏端坐猶揮汗出門豈容易忽
思公府內青衫折腰吏復想驛路中紅塵走馬使征夫
更辛苦逐客彌顛顛日入尚趨程宵分不遑寐安知北
牕叟偃卧風颯悉合切又音立至簾拂碧龍鱗扇搖白鶴翅豈
唯身所得兼示心無事誰言苦熱天元有清涼地

勃勃旱塵氣炎炎赤日光飛禽貼將墜行人渴欲狂壯

者不耐飢飢火燒其腸肥者不禁熱喘急汗如漿此時
方自悟老瘦亦何妨肉輕足健逸髮少頭清涼薄食不
飢渴端居省衣裳數匙粱飯冷一領綃衫香持此聊過
日焉知畏景長

偶作二首

戰馬春放歸農牛冬歇息何獨徇名人終身役心力來
者殊未已去者不知還我今悟已晚六十方退閒猶勝
不悟者老死紅塵間

名無高與卑未得多健羨事無小與大已得多厭賤如此常自苦反此或自安此理知甚易此道行甚難勿信人虛語君當事上看

池上作

西溪南潭皆池中勝處也

西溪風生竹森森南潭萍開水沉沉叢翠萬竿湘岸色空碧一泊松江心浦派縈迴誤遠近橋島向背迷窺臨澄瀾方丈若萬頃倒影咫尺如千尋泛然獨遊邈然坐坐念行心思古今菟裘不聞有泉沼西河亦恐無雲林

豈如白翁退老地樹高竹密池塘深華亭雙鶴白矯矯
太湖四石青岑岑眼前盡日更無客膝上此時唯有琴
洛陽冠蓋自相索誰肯來此同抽簪

何處堪避暑

何處堪避暑林間背日樓何處好追涼池上隨風舟日
高飢始食食竟飽還遊遊罷睡一覺覺來茶一甌眼明
見青山耳醒聞碧流脫襪閒濯足解巾快搔頭如此來
幾時已過六七秋從心至百骸無一不自由拙退是其

分榮耀非所求雖被世間笑終無身外憂此語君莫怪
靜思吾亦愁如何三伏月楊尹謫虔州

詔下

昨日詔下去罪人今日詔下得賢臣進退者誰非我事
世間寵辱常紛紛我心與世兩相忘時事雖聞如不聞
但喜今年飽飯喫洛陽禾稼如秋雲更傾一樽歌一曲
不獨忘世兼忘身

七月一日作

七月一日天秋生履道里閒居見清景高興從此始林
間暑雨歇池上涼風起橋竹碧鮮鮮岸莎青靡靡蒼然
古磐石清淺平流水何言中門前便是深山裏雙僮侍
坐卧一杖扶行止飢聞麻粥香渴覺雲湯美
胡麻粥
雲母湯
平生所好物今日多在此此外更何思市朝心已矣

開襟

開襟何處好竹下池邊地餘熱體猶煩早涼風有味黃
姜槐葉結紅破蓮芳墜無奈每年秋先來入衰思

自賓客遷太子少傅分司

頭上漸無髮耳間新有毫形容逐日老官秩隨年高優
饒又加俸閒穩仍分曹飲食免藜藿居處非蓬蒿何言
家尚貧銀榼提綠醪勿謂身未貴金章照紫袍誠合知
止足豈宜更貪饕默然心自問於國有何勞

自在

杲杲冬日光明暖真可愛移榻向陽坐擁裘仍解帶小
奴搥我足小婢搥我背自問我為誰胡然獨安泰安泰

良有以與君論梗槩心了事未了飢寒迫於外事了心
未了念慮煎於內我今實多幸事與心和會內外及中
間了然無一礙所以日陽中向君言自在

詠史

九年十一月作

秦磨利刀斬李斯齊燒沸鼎烹鄢其可憐黃綺入商洛
閒卧白雲歌紫芝彼為道醞机上盡此作鸞鳳天外飛
去者逍遙來者死乃知禍福非天為

因夢有悟

交友淪歿盡悠悠勞夢思平生所厚者昨夜夢見之夢

中幾許事枕上無多時款曲數盃酒從容一局碁

碁酒皆夢

中所見事

初見韋尚書

弘景

金紫何輝輝中遇李侍郎

建

笑言

甚怡怡終為崔常侍

玄亮

意色苦依依一夕三改變夢心

不驚疑此事人盡怪此理誰得知我粗知此理聞於竺
乾師識行妄分別智隱迷是非若轉識為智菩提其庶
幾

春遊

上馬臨出門出門復逡巡
回頭問妻子應怪春遊頻
誠知春遊頻其奈老大身
朱顏去復去白髮新更新
請君屈十指為我數交親
大限年百歲幾人及七旬
我今六十五走若下坂輪
假使得七十祇有五度春
逢春不遊樂但恐是癡人

題天竺南院贈閒元旻清四上人

雜芳閒草合繁綠巖樹新
山深景候晚四月有餘春
竹寺過微雨石逕無纖塵
白衣一居士方袍四道人
地是

佛國土人非俗交親城中山下別相送亦殷勤

哭師臯

南康丹旆引魂迴洛陽藍昇

雲俱切

送葬來北邙原邊草

樹畔月苦煙愁夜過半妻孥兄弟號一聲十二人腸一

時斷往者何人送者誰樂天哭別師臯時平生分義向

人盡今日哀冤唯我知我知何益徒垂淚藍輦迴竿馬

迴轡何日重聞掃市歌誰家收得琵琶妓

師臯醉後善歌掃市詞又

有小妓工琵琶不知今落在何處

蕭蕭風樹白楊影蒼蒼露草青蒿氣

更就墳邊哭一聲與君此別終天地

隱几贈客

宦情本淡薄年貌又老醜紫綬與金章於予亦何有有
時獨隱几音塔然無所偶卧枕一卷書起嘗一盃酒書

將引昏睡酒用扶衰朽客到忽已酣脫巾坐搔首踈頑
倚老病容恕慙交友忽思莊生言亦擬鞭其後

夏日作

葛衣疎且單紗帽輕復寬一衣與一帽可以過炎天止

於便吾體何必被羅紈宿雨林笋嫩晨露園葵鮮烹葵
炮嫩笋可以備朝飧止於適吾口何必飫腥羶飯訖盥
漱已捫腹方果然婆婆庭前步安穩牕下眠外養物不
費內歸心不煩不費用難盡不煩神易安庶幾無天閼
阿葛得以終天年

晚涼偶詠

日下西墻西風來北牕北中有逐涼人單牀獨棲息飄
蕭過雲雨搖曳歸飛翼新葉多好陰初筠有佳色幽深

小池館優穩閒官職不愛勿復論愛亦不易得

酬牛相公宮城早秋寓言見示兼呈夢得時夢
得有疾

七月中氣後金與火交爭一聞白雪唱暑退清風生碧
樹未搖落寒蟬始悲鳴夜涼枕簟滑秋燥衣巾輕疎受
老慵出劉楨疾未平何人伴公醉新月上宮城

小臺晚坐憶夢得

汲泉灑小臺臺上無纖埃解帶面西坐輕襟隨風開晚

涼閒興動憶同傾一盃月明候柴戶藜杖何時來

種桃歌

食桃種其核一年核生芽二年長枝葉三年桃有花憶
昨五六歲灼灼盛芬華迨茲八九載有減而無加去春
已稀少今春漸無多明年後年後芳意當如何命酒樹
下飲停盃拾餘葩因桃忽自感悲吒成狂歌

狂言示諸侄

世欺不識字我忝攻文筆世欺不得官我忝居班秩人

老多病苦我今幸無疾人老多憂累我今婚嫁畢心了
不移轉身泰無牽率所以十年來形神閒且逸况當垂
老歲所要無多物一裘煖過冬一飯飽終日勿言舍宅
小不過寢一室何用鞍馬多不能騎兩匹如我優幸身
人中十有七如我知足心中百無一傍觀愚亦見當
已賢多失不敢論他人狂言示諸侄

偶以拙詩數首寄呈裴少尹侍郎蒙以盛製四
篇一時酬和重投長句美而謝之

投君之文甚荒蕪數篇價值一束芻報我之章何璀璨
纍纍四貫驪龍珠毛詩三百篇後得文選六十卷中無
一麋麗龜絕報賽五鹿連柱難支梧高興獨因秋日盡
清吟多與好風俱銀鈎金錯兩殊重宜上屏風張座隅

白氏長慶集卷三十

欽定四庫全書薈要卷一萬三千九百六十一

集部

白氏長慶集卷三十一

唐 白居易 撰

律詩

凡一百首

六年冬暮贈崔常侍晦叔

時為河南尹

鬢毛霜一色
光景水爭流
易過唯冬日
難銷是老愁
香開綠蟻酒
煖擁褐綾裘
已共崔君約
樽前倒即休

戲招諸客

黃醅

鋪杯切綠醅

私呂切

迎冬熟絳帳紅爐逐夜開誰道洛

中多逸客不將書喚不曾來

十二月二十三日作兼呈晦叔

案頭厯日雖未盡向後唯殘六七行牀下酒瓶雖不滿
猶應醉得兩三場病身不許依年老拙宦虛教逐日忙
聞健偷閒且勤飲一杯之外莫思量

七年元日對酒五首

慶弔經過嬾逢迎跪拜遲不因時節日豈覺此時衰

衆老憂添歲余哀喜入春年開第七秩屈指幾多人

三杯藍尾酒一櫟

弋涉切

膠牙餠

徐盈切

除却崔常侍無人

共我爭

今朝吳與洛相憶一欣然夢得君知否俱過本命年

余與

蘇州劉郎中同壬子歲今年六十二

同歲崔何在同年杜又無

余與吏部崔相公甲子同歲與循州杜相公及第同年秋

冬二人俱逝

應無藏避處只有且歡娛

七年春題府廳

潦倒守三川因循涉四年推誠廢鉤距示恥用蒲鞭以
此稱公事將何銷俸錢雖非好官職歲久亦妨賢

早春醉吟寄太原令狐相公蘇州劉郎中

雪夜閒遊多秉燭花時暫出亦提壺別來少遇新詩敵
老去難逢舊飲徒大振威名降北虜勤行惠化活東吳
不知歌酒騰騰興得似河南醉尹無

洛下送牛相公出鎮淮南

北闕至東京風光十六程坐移丞相閣春入廣陵城紅

旆擁雙節白鬚無一莖萬人開路看百吏立班迎閭外
君彌重樽前我亦榮何須身自得將相是門生

元和初
牛相公

應制策登第三等
予為翰林考覈官

箏

雲髻飄蕭綠花顏旖旎紅雙眸剪秋水十指剥春蔥楚

艷為門閥秦聲是女工甲鳴銀珣

丁歷切

璫

郎狄切

柱觸玉

玲瓏後苦啼嫌月驚嬌語訖

乃禮切

風移愁來手底送恨

入絃中趙瑟清相似胡琴聞不同慢彈迴斷鴈急奏轉

飛蓬霜珮鏘還委冰泉咽復通珠聯千拍碎刀截一聲
終倚麗精神定矜能意態融歇時情不斷休去思無窮
燈下青春夜樽前白首翁且聽應得在老耳未多聾

洛中春遊呈諸親友

莫歎年將暮須憐歲又新府中三遇臘洛下五逢春
春樹花珠顆春塘水麴塵春娃無氣力春馬有精神

詠春
遊一

時之
態

並轡鞭徐動連盤酒慢巡經過舊隣里追逐好交

親笑語銷閒日酣歌送老身一生歡樂事亦不少於人

酬舒三員外見贈長句

自請假來多少日
五旬光景侶須臾
已判到老為狂客
不分當春作病夫
楊柳花飄新白雪
櫻桃子綴小紅珠
頭風不敢多多飲
能酌三分相勸無

將歸一絕

欲去公門返野扉
預思泉竹已依依
更憐家醞迎春熟
一甕醞醕待我歸

罷府歸舊居

自此後重授賓客
歸履道宅作

陋巷乘籃入朱門挂印迴腰間拋組綬纓上拂塵埃屈
曲閒池沼無非手自開青蒼好竹樹亦是眼看栽石片
擡琴匣松枝閣酒杯此生終老處昨日却歸來

睡覺偶吟

官初罷後歸來夜天欲明前睡覺時起坐思量更無事
身心安樂復誰知

問支琴石

疑因星隕空中落歎被泥埋澗底沉天上定應勝地上

支機未必及支琴提攜拂拭知恩否雖不能言合有心
自喜

身慵難勉強性拙易遲迴布被辰時起柴門午後開忙
驅能者去閒逐鈍人來自喜誰能會無才勝有才

裴常侍以題薔薇架十八韻見示因廣為三十
韻以和之

託質依高架攢華對小堂晚開春去後獨秀院中央霽
景朱明早芳時白晝長穠因天與色麗共日爭光剪碧

排千萼研朱染萬房煙條塗石綠粉藥撲雌黃根動彤

雲涌枝搖赤羽翔九微燈炫轉七寶帳熒煌淑氣熏行

徑清陰接步廊照梁迷藻枕耀壁變雕牆爛若聚

徂紅切

然火殷於葉得霜臙脂含笑臉蘇合裛

於業切

衣香浹冷

濡晨露玲瓏漏夕陽合羅排勘纈

胡結切

醉暈淺深粧乍

見疑迴面遙看誤斷腸風朝舞飛燕雨夜泣蕭娘桃李

慙無語芝蘭讓不芳山榴何細碎石竹苦尋常蕙慘偎

欄避蓮羞映浦藏怯教蕉葉戰妬得柳花狂豈可輕嘲

詠應須痛比方畫幀風自展繡幀

先諫切

蓋誰張翠錦挑

成字丹砂印著行猩猩凝血點瑟瑟蹙金匡散亂姜紅

片尖纖嫩紫芒觸僧飄毳褐留妓冒羅裳寡和陽春曲

多情騎省郎緣誇美顏色引出好文章東顧辭仁里

語曰

里仁為美又裴君所居名仁和里

西歸入帝鄉假如君愛殺留著莫移

將

裴君題詩之次而常侍詔到唱和未竟而軒騎西歸故云

感舊詩卷

夜深吟罷一長吁老淚燈前濕白鬚二十年前舊詩卷

十人酬和九人無

酬李二十侍郎

笋老蘭長花漸稀
衰翁相對惜芳菲
殘鶯著雨慵休轉
落絮無風凝不飛
行掇木芽供野食
坐牽蘿蔓挂朝衣
十年分手今同醉
醉未如泥莫道歸

和夢得

夢得來詩云謾讀圖書四十車年年為
郡老天涯一生不得文章力百口空為

飽煖
家

綸閣沉沉無寵命
蘇臺籍籍有能聲
豈唯不得清文力

但恐空傳冗吏名郎署迴翔何水部江湖留滯謝宣城
所嗟非獨君如此自古才難共命爭

贈草堂宗密上人

吾師道與佛相應念念無為法法能口藏宣傳十二部
心臺照耀百千燈盡離文字非中道長住虛空是小乘
少有人知菩薩行世間只是重高僧

喜照密閒實四上人見過

紫袍朝士白髯翁與俗乖疎與道通官秩三迴分洛下

交遊一半在僧中臭帟

農都切

世界終須出香火因緣久

願同齋後將何充供養西軒泉石北牕風

贈皇甫六張十五李二十三賓客

昨日三川新罷守今年四皓盡分司幸陪散秩閒居日
好是登山臨水時家未苦貧常醞酒身雖衰病尚吟詩
龍門泉石香山月早晚同遊報一期

微之敦詩晦叔相次長逝歸然自傷因成二絕
併失鵲鷺侶空留麋鹿身只因嵩洛下長作獨遊人

長夜君先去殘年我幾何秋風滿衫淚泉下故人多

池上閒詠

青莎臺上起書樓綠藻潭中繫釣舟日晚愛行深竹裏
月明多上小橋頭
釐嘗新酒還成醉亦出中門便當遊
一部清商聊送老白鬚蕭颯管絃秋

涼風歎

昨夜涼風又颯然
螢飄葉墜卧牀前
逢秋莫歎須知分
已過潘安三十年

和高僕射罷節度讓尚書授少保分司喜遂游

山水之作

楚辭八座罷雙旌便作登山臨水行能以忠貞酬重任
不將富貴礙高情朱門出去簪纓從絳帳歸來歌吹迎
鞍轡閑裝光滿馬何人信道是書生

送考功崔郎中赴闕

稱意新官又少年秋涼身健好朝天青雲上了無多路
却要徐驅穩著鞭

重修香山寺畢題二十二韻以紀之

闕塞龍門口祇園鷺

音就

嶺頭曾隨滅劫壞今遇勝緣修

再瑩新金剎重裝舊石樓病僧皆引起忙客亦淹留四
望窮沙界孤標出贍州地圖鋪雒邑天柱倚松丘兩面
蒼蒼岼中心瑟瑟流波翻八灘雪堰護一潭油臺殿朝
彌麗房廊夜更幽千花高下塔一葉往來舟岫合雲初
吐林開霧半收靜聞樵子語遠聽棹郎謳官散殊無事
身閒甚自由吟來攜筆硯宿去抱衾裯霽月當牕白涼

風滿簾秋煙香封藥竈泉冷洗茶甌南祖心應學西方
社可投先宜知止足次要悟浮休覺路隨方樂迷塗到
老愁須除愛名障莫作戀家囚便合窮年住何言竟日
遊可憐終老地此是我菟裘

土胡切

裘

送楊八給事赴常州

無嗟別青瑣且喜擁朱輪五十得三品百千無一人須
勤念黎庶莫苦憶交親此外無過醉毗陵何限春

聞歌者唱微之詩

新詩絕筆聲名歇舊卷生塵篋
竒深時向歌中聞一句
未容傾耳已傷心

醉送李二十常侍赴鎮浙東

靖安客舍花枝下共脫青衫典濁醪
今日洛橋還醉別
金杯翻汙麒麟袍
喧闐夙駕君脂轄
酩酊離筵我藉糟
好去商山紫芝伴
珊瑚鞭動馬頭高

醉別程秀才

五度龍門點額迴却緣多藝復多才
貧泥客路粘難出

愁鎖鄉心掣不開何必更遊京國去不如且入醉鄉來
吳絃楚調瀟湘弄為我殷勤送一杯

程生善琴尤能沉湘曲

自詠

白衣居士紫芝仙半醉行歌半坐禪今日維摩兼飲酒
當時綺季不請錢等閒池上留賓客隨事燈前有管絃
但問此身銷得否分司氣味不論年

把酒思閒事二首

把酒思閒事春愁誰最深乞錢羈客面落第舉人心月

下低眉立燈前抱膝吟憑君勸一醉勝與萬黃金
把酒思閒事春嬌何處多試鞍新白馬弄鏡小青娥掌
上初教舞花前欲按歌憑君勸一醉勸了問如何

衰荷

白露凋花花不殘涼風吹葉葉初乾無人解愛蕭條境

更遶衰藜

祖紅切

一匝看

池上送考功崔郎中兼別房賁二妓

文昌別宿徵還日洛浦行雲放散時鷓鴣上天花逐水

無因再會白家池

自問

依仁臺廢悲風晚履信池荒宿草春

晦叔亭臺在依仁微之池館在履信

自問老身騎馬出洛陽城裏覓何人

送陳許高僕射赴鎮

敦詩說禮中軍帥重士輕財大丈夫常與司徒同苦樂
不教親故隔榮枯花鈿坐遶黃金印絲竹行隨白玉壺
商皓老狂唯愛醉時能寄酒錢無

青氍帳二十韻

合聚千羊毛毳

蚩瑞切

施張百子卷

司馬遷書云張空卷

骨盤邊柳健

色染塞藍鮮北製因戎鞞南移逐虜遷汰風吹不動禦

雨濕彌堅有頂中央聳無隅四嚮圓傍通門豁爾內密

氣溫然遠別關山外初安庭戶前影孤明月夜價重苦

寒年軟暖圍氍毹

吐敢切

鎗撻束管絃最宜霜後地偏稱

雪中天側置低歌座平鋪小舞筵閒多揭簾入醉便擁

袍眠鐵檠

渠京切

移燈背銀囊帶火懸深藏曉蘭焰間貯

宿香煙獸炭休親近孤裘可棄捐硯溫融凍墨瓶煖變
春泉蕙帳徒招隱茅庵浪坐禪貧僧應歎羨寒士定留
連賓客於中接兒孫向後傳王家誇舊物未及此青氊

王子敬語偷兒
青氊我家舊物

答夢得秋日書懷見寄

幸免非常病甘當本分衰眼昏燈最覺腰瘦帶先知樹
葉霜紅日髭鬚雪白時悲愁緣欲老老過却無悲

同諸客題于家公主舊宅

平陽舊宅少人遊，應是遊人到即愁。
春穀鳥啼桃李院，絡絲蟲怨鳳皇樓。
臺傾滑石猶殘砌，簾斷珍珠不滿鉤。
聞道至今蕭史在，髭鬚雪白向明州。

荅夢得八月十五日夜翫月見寄

南國碧雲客，東京白首翁。
松江初有月，伊水正無風。
遠思兩鄉斷，清光千里同。
不知娃館上，何侶石樓中。

其夜余在

龍門石樓上望月

初冬早起寄夢得

起戴烏紗帽行披白布裘爐溫先煖酒手冷未梳頭早
起煙霜白初寒烏雀愁詩成遣誰和還是寄蘇州

秋夜聽高調涼州

樓上金風聲漸緊月中銀字韻初調促張絃柱吹高管

一曲涼州入汴

音血又
音決

寥

香山寺二絕

空門寂靜老夫閒伴鳥隨雲往復還家醞滿瓶書滿架
半移生計入香山

愛風巖上攀松蓋戀月潭邊坐石稜且共雲泉結緣境
他生當作此山僧

送舒著作重授省郎赴闕

三歲相依在洛都遊花宴月飽歡娛惜別笙歌多怨咽
願留軒蓋少踟躕劍磨光彩依前出鵬舉風雲逐後驅
從此求閒應不得更能重醉白家無

同諸客嘲雪中馬上妓

珊瑚鞭韉

丁可切

馬踟躕引手低蛾索一盃腰為逆風成

弱柳面因衝冷作凝酥銀篦穩簪

作紺切

烏羅帽花簷宜

乘叱撥駒雪裏君看何所似王昭君妹寫真圖

喜劉蘇州恩賜金紫遙想賀宴以詩慶之

海內姑蘇太守賢恩加章綬豈徒然賀賓喜色欺杯酒
醉妓歡聲過管絃魚珮葦鱗光照地鵲銜瑞帶勢冲天
莫嫌鬢上些些白金紫由來稱長年

藍田劉明府攜酌相過與皇甫郎中外時同飲

醉後贈之

臘月九日煖寒客卯時十分空腹杯玄晏舞狂烏帽落
藍田醉倒玉山顏貌偷花色老顰去歌蹋柳枝春閨來
不為劉家賢聖物愁翁笑口大難開

劉蘇州以華亭一鶴遠寄以詩謝之

老鶴風姿異衰翁詩思深素毛如我鬢丹頂侶君心松
際雪相映雞羣塵不侵殷勤遠來意一隻重千金

早春憶蘇州寄夢得

吳苑四時風景好就中偏好是春天霞光曙後殷於火

水色晴來嫩侶煙士女笙歌宜月下使君金紫稱花前
誠知歡樂堪留戀其奈離鄉已四年

嘗新酒憶晦叔二首

樽裏看無色杯中動有光自君拋我去此物共誰嘗
世上強欺弱人間醉勝醒自君拋我去此語更誰聽

負春

病來道士教調氣老去山僧勸坐禪孤負春風楊柳曲
去年斷酒到今年

池上閒吟二首

高卧閒行自在身
池邊六見柳條新
幸逢堯舜無為日
得作羲皇向上人
四皓再除猶且健
三州罷守未全貧
莫愁客到無供給
家醞香濃野菜春

非莊非宅非蘭若
竹樹池亭十畝餘
非道非僧非俗吏
褐裘烏帽閉門居
夢遊信意寧殊蝶
心樂身閒便是魚
雖未定知生與死
其間勝負兩何如

早春招張賓客

久雨初晴天氣新
風煙草樹盡欣欣
雖當冷落衰殘日
還有陽和暖活身
池色溶溶藍染水
花光焰焰火燒春
商山老伴相收拾
不用隨他年少人

營閒事

自笑營閒事從朝到日斜
澆畦引泉脉掃逕避蘭芽
暖變墻衣色晴催木筆花
桃根知酒渴晚送一甌茶

感春

老思不禁春風光照眼
新花房紅鳥觜池浪碧
魚鱗倚

棹誰為伴持杯自問身心情多少在六十二三人

春池上戲贈李郎中

滿池春水何人愛唯我迴看指侶君直侶按奴回切藍新

汁色與君南宅染羅裙

翫半開花贈皇甫郎中

八年寒食日池東小樓上作

勿訝春來晚無嫌花發遲人憐全盛日我愛半開時紫

蠟粘為蒂紅蘇點作蕤

如佳切

成都新夾纈

胡結切

梁漢碎

臙脂樹杪真珠顆牆頭小女兒淺深粧駁落高下火參

差蝶戲爭香，鶯啼選穩枝。
好教郎作伴，合共酒相隨。
醉翫無勝此，狂嘲更讓誰。
猶殘少年興，未是老人詩。
西日憑輕照，東風莫殺吹。
明朝應爛熳，後夜更離披。
林下遙相憶，樽前閣有期。
銜杯嚼蘂思，唯我與君知。

池邊

柳老香絲宛，荷新鈿扇圓。
殘春深樹裏，斜日小樓前。
醉遣收杯杓，閒聽理管絃。
池邊更無事，看補採蓮船。

家釀新熟，每嘗輒醉妻姪等。
勸令少飲，因成長。

句以諭之

君應怪我朝朝飲不說向君君不知身上幸無疼痛處
甕頭正是撇嘗時劉妻勸諫夫休醉王姪分疏叔不癡
六十三翁頭雪白假如醒黠欲何為

送常秀才下第東歸

東歸多旅恨西上少知音寒食看花眼春風落第心百
憂當二月一醉直千金到處公卿席無辭酒盞深

且遊

手裏一杯滿心中百事休春應唯仰醉老更不禁愁弄
水迴船尾尋花信馬頭眼看筋力減遊得且須遊

題王家莊臨水柳亭

弱柳緣堤種虛亭壓水開條疑逐風去波欲上階來翠
羽偷魚入紅罾學舞迴春愁正無緒爭不盡殘杯

題令狐家木蘭花

膩如玉指塗朱粉光侶金刀剪紫霞從此時時春夢裏
應添一樹女郎花

拜表廻閒遊

玉珮金章紫花綬
紵衫藤帶白綸巾
晨興拜表稱朝士
晚出遊山作野人
達磨傳心令息念
玄元留語遣同塵
八闕淨戒齋銷日
一曲狂歌醉送春
酒肆法堂方丈室
其間豈是兩般身

西街渠中種蓮疊石頗有幽致偶題小樓

朱檻低牆上清流
小閣前庭人栽菡
萏買石造潺湲影
落江心月聲移谷
口泉閒看卷簾坐
醉聽掩牕眠路笑

淘官水家愁費料錢是非君莫問一對一條然

晚春閒居楊工部寄詩楊常州寄茶同到因以
長句荅之

宿醒寂寞眠初起春意闌珊日又斜
勸我加餐因早笋恨人休醉是殘花
悶吟工部新來句渴飲毗陵遠到茶
兄弟東西官職冷門前車馬向誰家

玉泉寺南三里澗下多深紅躑躅繁艷殊常感
惜題詩以示遊者

玉泉南澗花奇怪不似花叢似火堆今日多情唯我到
每年無故為誰開寧辭辛苦行三里更與留連飲兩杯
猶有一般孤負事不將歌舞管絃來

早服雲母散

曉服雲英漱井華寥然身若在煙霞藥銷日晏三匙飯
酒渴春深一碗茶每夜坐禪觀水月有時行醉翫風花
淨名事理人難解身不出家心出家

三月晦日晚聞鳥聲

晚來林鳥語殷勤，侶惜風光說向人。
遣脫破袍勞報暖，催沽美酒敢辭貧。
聲聲勸醉應須醉，一歲唯殘半日春。
早夏遊平原廻

夏早日初長，南風草木香。
肩輿頗平穩，澗路甚清涼。
紫蕨行看採，青梅旋摘嘗。
療飢兼解渴，一盞冷雲漿。

宿天竺寺廻

野寺經三宿，都城復一還。
家仍念婚嫁，身尚繫朝班。
瀟洒秋臨水，沉吟晚下山。
長閒猶未得，逐日且偷閒。

侍中晉公欲到東洛先蒙書問期宿龍門思往

感今輒獻長句

昔蒙興化池頭送

大和三年春居易授賓客分司東
來時蒙侍中於興化里池上宴送今

許龍門潭上期聚散但慙長見念榮枯安敢道相思功
成名遂來雖久雲卧山遊去未遲聞說風情筋力在只
如初破蔡州時

奉和晉公侍中蒙除留守行及洛師感悅發中

斐然成詠

鸞鳳翱翔在廖廓
貂蟬瀟灑出埃塵
致成堯舜昇平代
收得夔龍強健身
拋擲功名還史冊
分張歡樂與交親
商山老皓雖休去
終是留侯門下人

送劉五司馬赴任硤州兼寄崔使君

位下才高多怨天
劉兄道勝獨恬然
貧於楊子兩三倍
老過榮公六七年
筆硯莫拋留壓案
簞瓢從陋也銷錢
郡丞自合當優禮
何況夷陵太守賢

菩提寺上方晚眺

樓閣高低樹淺深山光水色暝沉沉
嵩煙半卷青綃幕
伊浪平鋪綠綺衾
飛鳥滅時宜極目
遠風來處好開襟
誰知不離簪纓內
長得逍遙自在心

楊柳枝詞八首

六么水調家家唱
白雪梅花處處吹
古歌舊曲君休聽
聽取新翻楊柳枝

陶令門前四五樹
亞夫營裏百千條
何侶東都正二月
黃金枝映洛陽橋

依依嫋嫋復青青勾引春風無限情
白雪花繁空撲地
綠絲條弱不勝鶯

紅板江橋青酒旗館娃宮暖日斜時
可憐雨歇東風定
萬樹千條各自垂

蘇州楊柳任君誇更有錢塘勝館娃
若解多情尋小小
綠楊深處是蘇家

蘇家小女舊知名楊柳風前別有情
剝條盤作銀環樣
卷葉吹為玉笛聲

葉含濃露如啼眼
枝嫋輕風似舞腰
小樹不禁攀折苦
乞君留取兩三條

人言柳葉侶愁眉
更有愁腸侶柳絲
柳絲挽斷腸牽斷
彼此應無續得期

浪淘沙詞六首

一泊沙來一泊去
一重浪滅一重生
相攬相淘無歇日
會教山海一時平

白浪茫茫與海連
平沙浩浩四無邊
暮去朝來淘不住

遂令東海變桑田

青草湖中萬里程
黃梅雨裏一人行
愁見灘頭夜泊處
風翻閣浪打船聲

借問江潮與海水
何侶君情與妾心
相恨不如潮有信
相思始覺海非深

海底飛塵終日有
山頭化石豈無時
誰道小郎拋小婦
船頭一去沒廻期

隨波逐浪到天涯
遷客生還有幾家
却到帝鄉重富貴

請君莫忘浪淘沙

白氏長慶集卷三十一


謹案卷三十第七頁前二行此仍著於適按別本

適作迹

卷三十一第五頁後四行臘脂含笑臉按全唐詩

笑臉作臉笑





總校官庶吉士臣張能照
校對官庶吉士臣徐如澍
膳錄貢生臣周志禮